

2019

Kalaallit efterskoleni atuartut
atuarnerminnik unitsitsisarnerannut
patsisaasut



Kalaallit
Meerartaat  Grønlandske
Børn

Paasissutissanik nalunaarsukkanik
tunngaveqarluni misissuinermiit
nalunaarusiaq naatsoq. Nalunaarusiaq
Kalaallit Nunaanni Ilinniartitaanermut
Aqutsisoqarfik sinnerlugu Kalaallit
Meerartaanit suliaavoq.

Tunuliaqutaa

Ukiut tamaasa kalaallit inuusuttut 300-t missaat efterskolerialutik Danmarkimut aallartarput. Naak atuarnermik unitsitsiinnartarneq ukiuni kingullerni sisamani 20 %-ip ataataarneraniit 17 %-ip missaanut apparialuartoq, inuusuttut taakkua ilaasa suli amerlavallaat ukioq efterskolerfitsik naammassinngitsoortarpaat. Taamaattumik atuartut efterskolelertussat efterskolernerminnik ikerinnakkut unitsitsinissaminnut annerpaamik ilimanaateqarnerpaasut kikkunerinik paasisaqarnissaq imaluunniit inuusuttut naammassinittarnerannut uniinnartarnerannulluunniit pissutsit aalajangeeqataasartut suunerinik aalajangiussinissaq misissuinerimi matumani siunertaavoq. Taamaaliornikkut soqutiginnittut allat, soorlu Efterskoleforeningi aamma Kalaallit Illui, peqatigalugit suliniutinik nutaanik ineriartortitsisinnaasaagut, atuartut taakkua efterskoleni atualernissaat sioqqullugu efterskolernerminnilu iluaqutigisinnaasaannik. Assersuutigalugu efterskolemut aallarnissaat sioqqullugu piareersimatinnerulernerisigut efterskolemiinnerinilu siunertalimmik ikorfartuutinik neqeroorfiginerisigut.

Nalunaarusiaq Kalaallit Meerartaata Ilinniartitaanermut Aqutsisoqarfik suleqatigalugu suliaraa. Misissuinerimi inernerit suli itinerusumik misissuisinnaanermut kiisalu paasissutissanik nalunaarsuinerimi periutsit atuuttut pitsaanngoriaatissaannut inassuteqaatinut tunngaviliisuussapput. Taama ilionikkut siunissami efterskolelertussat uniinnarnissaannut patsisaajumaartut takujuminarnerulissapput suliniutillu pisariaqartut ingerlaavartumik pilersinneqarsinnaassallutik.

Misissuinerimi periuseq paasissutissallu amigaateqarsinnaasut

Misissuinerimi paasissutissat nalunaarsukkat, Ilinniartitaanermut Aqutsisoqarfimmiit pissarsiarineqartut, aallaaviupput. Ilinniartitaanermut Aqutsisoqarfimmi siunnersortit (efterskoleni ingerlatsivimmi sulisut) Kalaallillu Illuini ilinniartitaanermut siunnersortit paasissutissat angajoqqaanit, atuartunit, ilinniartitsisunit attaveqaataasunit imaluunniit ilaqtariinnit attaveqaataasunit pissarsiarineqartut nalunaarsorneqarsimapput. Paasissutissat pineqartut assaannarmik immiunneqarput, taamaattumik paasissutissat taakkua immikkualuttortai assigiinngitsorpasuupput nalunaarsornerilu annertuumik assigiinngissitaarsinnaallutik.

Siullertut inuit ataasiakkaarlugit misissuiffigineqarput, tamatumalu kingorna taakkua tunngavigalugit ataatsimut oqaatigineqarsinnaasut nalunaarusiami matumani saqqummiunneqarput. Inerinerit inuttaat ilisarineqarsinnaajunnaarlugit saqqummiunneqarput. Paasissutissat sanilliussinnaajumallugit ukiut atuarfiusut 2016/2017, 2017/2018 aamma 2018/2019 misissuinerimi ilanngunneqarput.

Paasissutissat tunngavigalugit pissutsit ukua imminnut ataqatigiinnersut takuneqarsinnaanersoq misissorparput:

- Inuusuttut ukiui suaassusaallu
- Inuusuttut efterskolemi aallartinginnerminni najugaqarfii (sumiinneri aammalu illoqarfiit/nunaqarfiit angissusii)
- Danmarkimi efterskole (angissusii, sumiinneri aamma kalaallit atuartut atuartorisinnaasaasa amerlassusii)
- Inuusuttut uniinnartarnerinut patsisit
- Inuusuttut efterskolemi qanga uniinnarnersut

Taakkua saniatigut inuusuttut pineqartut sunik ilinniagaqalersimani ilinniakkamillu aallartitaminnik suli ingerlatsinersut aamma misissorusussimagaluarparput. Misissuiniarnerli taanna paasissutissat nalunaarsukkat pigineqartut tunngavigalugit ingerlanneqarsinnaasimangilaq.

Tamatuma kingorna paasissutissat pigisagut paasissutissanik ilaatigut soorlu efterskolet angissusiinut¹, kalaallit ukiumi atuarfiusumi atuartut amerlassusiinut assigisaannullu tunngasunik ilavagut. Taamatut pisoqareermat efterskolelinnginnermi illoqarfiup najugarisap qanoq inuttutiginera kiisalu uniinnartarnerup patsisigisai najoqqutaralugit paasissutissat katersukkat immikkoortulersorneqarput.


Misissuinermi atuartut ilaasa amigaataasinnaanerat matumani taaneqassaaq. Uniinnarneq il. il. taamaallaat nalunaarsorneqartarput, atuartoq telefonikkut nalunaaraangat efterskolemiinnerminik unitsitsiinnarluni imaluunniit angerlamut angalanissamut akiliunneqarnissamik qinnuteqartoqarsimagaangat. Taamaattumik atuartoqarsinnaavoq uniinnarsimasunik nalunaarsorneqarfiini ilaanngitsunik.

Misissuinerup ineneri

Inuusuttut efterskolertut amerlassusii

Ukiuni kingullerni pingasuni ukiut tamaasa inuusuttut efterskolertartut annikitsumik amerliartorput. Ukiuni ataatsimi nukappiaqqat efterskolemukartut amerlanerupput, ukiunili allani nukappiaqqat niviarsiaqqallu amerlaqatigittarput, tamannalu ukiumi pineqartumi siullermi nukappiaqqat atuartut amerlanerusimanagerannik patsiseqarsinaavoq. Uniinnartut ukiumi atuarfiusumi 2017/2018-imi ikileriarput, kisiannili 2018/2019-imi aallaqqaataanisullu amerlatigeqqilerlutik. Ataatsimut isigalugu niviarsiaqqat piffissaq naanngitsoq efterskolernerminnik unitsitsiinnarnissaat ilimanaateqarnerpaavoq – nukappiaqqat uniinnarnissaasa marloriaataanik annertutigisumik ilimanaateqarluni.

Takussutissiaq 1. Inuusuttut efterskolertarsimasut taakkualu uniinnartarnerisa annertussusaat suaassusiinut agguakkat



¹ (atuartut amerlassusii 15. sept. 2019-imi paasissutissiissutigineqartut najoqqutaralugit)

Uniinnartarney ukiuinut agguagaq

Ukiut taakkua pingasut ataatsimut isigalugit uniinnartarney oqaatigissagaanni inuusuttut efterskolemi aallartinnerminni ukiui najoqqutaralugit agguarsimanerat takussutissiaq 2-mi takuneqarsinnaavoq.

Takussutissiaq 2. Inuusuttut efterskoleni atuartut amerlassusii taakkualu atualernerminni ukiui najoqqutaralugit uniinnartarnerisa agguarsimanerat

	Aallartittut amerlassusii	Unittut amerlassusii	Uniinnartarney procentinngorlugu
14-inik ukiullit:	52	8	15,4 %
15-inik ukiullit:	295	41	13,9 %
16-inik ukiullit:	455	85	18,7 %
17-inik ukiullit:	58	8	13,8 %
Katillugit	860	142	

Assigiinngitsunik ukiulinni uniinnarney procentinngorlugu annertuumik assigiinngissuteqanngilaq. Taamatuttaaq ukioqatigiikkuutaat ataasiakkaat uniinnarnermut patsisigisaannik immikkut ittumik takussaasoqanngilaq. Tamatuma akerlianik uniinnartarnermut patsisaasut ukioqatigiikkuutaanut assigiiarlutik agguarsimapput. Taamaattumik atualernermi ukiorisap uniinnartarnermut imaluunniit uniinnartarnerup patsisigisaanut sunniuteqartartoq takussutissaqanngivippoq.

Kalaallit efterskoleni ataasiakkaani atuartut amerlassusii uniinnartarnerullu imminnut ataqatigiinnerat

Ukiumi atuarfiusumi 2016/2017-imi kalaallit atuartut 85-it qallunaat efterskoliini atualerput. Efterskoleni ataasiakkaani kalaallit atuartut taamaallaat 1-2-t atuartussatut nalunaaqqasarput. Atuartut taakkua Danmarkimi ukiumi atuarfiusumi tassani efterskolertut tamakkerlutik 31,4 %-eraat. Ukiumi atuarfiusumi 2017/2018-imi kalaallit atuartut 82-iupput, efterskolertut tamakkerlutik 27,5 %-erisaat. Ukiumilu atuarfiusumi 2018/2019-imi kalaallit atuartut 93-iupput, Danmarkimi efterskolertut tamakkerlutik 32,0 %-erisaat.

Tassa kalaallit Danmarkimi efterskoleni atualersut tamakkerlutik 1/3-iisa missaat kisimiillutik imaluunniit amerlanerpaajugunik marluullutik Kalaallit Nunaanneertuullutik aallartittarput. Soorlu takussutissiaq 3-mi takutinneqartoq, uniinnartarney procentinngorlugu kalaallini atuartuni atuarfinni kalaallinik atuartukitsulinni annertunerusarpoq.

Takussutissiaq 3. Matuma kinguliani kalaallit atuartut atuarfinni 1-2-nik kalaallinik atuartulinni kiisalu kalaallit atuartut tamakkerlutik akornanni uniinnartarnerup procentinngorlugu assigiinngissutaat takutinneqarpoq

	Uniinnartut procentinng. kalallit atuartut akornanni 1-2-nik kalaallinik atuartoqarfiusuni atuartulinni	Uniinnartut procentinng. kalaallit atuartut akornanni 3-nik imal. amerlanernik
Ukioq atuarfiusoq 2016/2017	23,5 %	14 %
Ukioq atuarfiusoq 2017/2018	19,5 %	13,9 %
Ukioq atuarfiusoq 2018/2019	21,5 %	15,4 %


Illoqarfiup angissusaata uniinnartarnermut sunniutai

Matuma kinguliani efterskoleni atuartut taakkualu uniinnartarnerisa amerlassusii illoqarfinnut aggerfigisaannut suaassusaannullu immikkoortiterlugit agguarneqarput. Efterskolemi atuartut immikkoortumi illoqarfimmi 10.000-it sinnerlugit inulimmi inissinneqartut taamaallaat Nuummeersuupput. Immikkoortut tulliuuttut tassaapput illoqarfiit Kalaallit Nunaat tamakkerlugu siaruarsimasut. Ukiut atuarfiusut taakkua pingasut ataatsimut isigigaanni efterskolerniarlutik nalunaartartut illoqarfimmiit illoqarfimmut amerlasuutigut assigiiarput. Immikkoortuni annerpaani pingasuni, tassa "10.000-it sinnerlugit inulinneersut", "9999-2000-inik inulinneersut" aamma "1999-500-nik inulinneersut", ukiuni taakkunani pingasuni uniinnartarnerat allanngorangaanngilaq, taamaattorli niviarsiaqqat Nuummeersut 2018/2019-imi efterskolerlutik uniinnartut malunnartumik amerleriarnerat takuneqarsinnaavoq. Immikkoortumi uniinnartarnerup patsisigisaanik erseqqinnerusumik misissuiffiusumi ukiumi pineqartumi aggerfimmiillu tassangaaneersut uniinnarnerminnut patsisigisaat annertunerusumik sammineqassapput.


Immikkoortuni kingullerni marlunni "499-200-nit inulinneersuni" aamma "199-1-init inulinneersuni" uniinnarnermut procenti statistikkikkut annertuumik nalorninarloqarfiuvoq, taakkunanimi atuartut ima ikitsigipput atuartup ataatsip uniinnarnera uniinnarnermut procentip annertuumik qaffanneranik kinguneqartarluni. Ataatsimulli isigalugu uniinnartarneq immikkoortunit allanit qaffasinnerunngilaq. Taamaammat inuusuttut nunaqarfinneersut illoqarfinneersunit uniinnarnerusarnerannik isuma sukkulluunniit tunngavilersuutissaqanngilaq. Uniinnartarnermut procenti immikkoortumi "1999-500-nit inulinneersuni" qaffasinnerpaavoq, tasanilu pineqarnerupput inuusuttut Paamiuneersut Narsameersullu. Taamatuttaat Tasiilaq immikkoortumi "9999-2000-inik inulinneersuni" uniinnarnermut malunnavissumik ilapittuutaavoq.

Takussutissiaq 4. Atuartut efterskolertut illoqarfiup angerlarsimaffiisa inuttussusaat suaassusiilu aallaavigalugit agguarsimani

Ukioq atuarfiusoq 2016/2017



Ukioq atuarfiusoq 2017/2018



Ukioq atuarfiusoq 2018/2019



Uniinnartarnermut patsisaasut

Uniinnartarnermut patsisaasut pingaarnerpaat suuneri takutikkumallugit paasissutissat nalunaarsornerini patsisit taakkartorneqartut immikkoortunut ukununga katersorpagut: anisitaaneq, atuarfiup avataani pisoq ilungersunartoq, atugarliorneq/inerisimanginneq, angerlarserneq, oqaatsit, ilisimaneqanngilaq aamma allat. Paasissutissiiffimmi tulliuuttumi immikkoortut imai ersarissarneqarput.

Uniinnartarnerit immikkoortuisa nassuiaataat

Anisitaaneq: efterskolep suleqatigiinneq atorunnaarsippaa / atuartoq anisitaavoq ukua patsisigalugit: malittarisassanik unioqqutitsineq, inersimasunik oqqateqarneq, imigassaq/aanngajaarniutit, nakuuserneq, tillinniarneq, akiliinngitsoorneq.

Atuarfiup avataani pisoq ilungersunartoq: ilaqtariinni attaveqarfiusuni innarliineq, ilaqttani napparsimasoqarnera, ilisimaneqanngitsoq.

Atugarliorneq/inerisimanginneq: atugarliorneq / inerisimanginneq – ilaatigut oqaatsinut, ittoornermut imaluunniit ilinniagakinnermut, kiisalu efterskolemik sungiussinnginnermut attuumassuteqarsinnaapput.

Tarnikkut ajornartorsiutit: annilaanganeq, isummakkut nanertisimaneq (depression), pimmatiginninneq (mobning), imminut innarlerneq, imminut toqoriarneq.

Angerlarserneq: immikkoortumi tassaniippat atuartup angerlarsernera angajoqqaallu meeqqaminnik maqaasinerat – taakkua ilaatigut atuartup efterskolemut tulluannginnermut aamma attuumassuteqarsinnaapput.

Oqaatsit: atuartoq oqaatsitigut unammilligassaqarpoq kiisalu suleqatigiinni peqataaneq ajorpoq.

Ilisimaneqanngilaq: paasissutissiissutigineqanngilaq.

Allat: sapigaqarneq, naartuneq, ilaqtariinnik attaveqaatinik amigaateqarneq, timersornikkut innarlerneq il. il.

Takussutissiaq 5. Efterskolemi atuartut uniinnarnermut patsisaasunut suaassusiilu tunngavigalugit agguarsimanerat

Uniinnarnermut patsisaasoq	2016/2017			2017/2018			2018/2019		
	Katinneri			Katinneri			Katinneri		
Anisitaaneq	7	♂ 7	♀ 0	8	♂ 6	♀ 2	12	♂ 7	♀ 5
Pisoq ilungersunartoq	2	♂ 1	♀ 1	1	♂ 0	♀ 1	4	♂ 1	♀ 3
Atugarliorneq / inerisimannginneq	9	♂ 3	♀ 6	9	♂ 3	♀ 6	8	♂ 2	♀ 6
Tarnikkut ajornartorsiutit	2	♂ 1	♀ 1	8	♂ 1	♀ 7	10	♂ 3	♀ 7
Angerlarserneq	6	♂ 1	♀ 5	8	♂ 4	♀ 4	7	♂ 0	♀ 7
Oqaatsit	0	♂ 0	♀ 0	0	♂ 0	♀ 0	3	♂ 0	♀ 3
Ilisimaneqanngilaq	20	♂ 9	♀ 11	7	♂ 2	♀ 5	5	♂ 1	♀ 4
Allat	0	♂ 0	♀ 0	5	♂ 0	♀ 5	1	♂ 0	♀ 1
Katillugit	46			46			50		

Kisitsisit uniinnarnermut patsisaasunik takutitsisut misissoraanni paasinarsivoq uniinnarnermut patsisaasut pingaarnerit sisamaasut: anisitaaneq, atugarliorneq, tarnikkut ajornartorsiutit angerlarsernerlu. Taamaattorli kisitsisit 2016/2017-imeersut nalorninartortaqarput, ukiumi tassani inuusuttut affangajaasa uniinnarnerinut patsisaasut ilisimaneqanngimmata.

Atuartut anisitaasut illoqarfinnit anginerusuneersuupput. Atuartunit 27-iusunit 19-init immikkoortuni "10.000-it sinnerlugit inulinni" aamma "9999-2000-inik inulinni" nassaassaapput, amerlanerpaallu Kitaaneersuullutik. Atuartut anisitaasut ilaat 19-it Nuummeersuupput Nuussuarmeersuullutilluunniit. Kingulliit arfineq pingasut Kalaallit Nunaata sinneraneersuupput – soorlu Tasiilamiit, Narsamiit, Sisimiuniit Upernavimmiillu.

Anisitaasartut amerliartorput, pingaartumik ukiumi kingullermi niviarsiaqqat amerlapput, ukiunilu tulleriinni pingasuni tamani amerliartoramik ukiumi atuarfiusumi 2018/2019-imi anisitaaneq uniinnarnermut patsisaasut annerpaartarivaat.

Pisut ilungersunartut immikkoortuni tamaniipput illoqarfiillu angissusaat apeqqutaatinnagit pisarlutik. Pisulli ilungersunartut amerlanerpaat, "innarliinermik" taaneqartut, inuusuttut Tasiilameersut, Kulusumeersut Paamiuneersullu akornanni nassaassaapput, akerlianillu ilaqutariinni napparsimaneq immikkoortut sinnerini pingaarnertut patsisaasarpog. Tassani pineqarput nukappiaqqat niviarsiaqqallu, ukiunilu atuarfiusuni ataasiakkaani atuartut marlussuit taanna patsisigalugu uniinnartarput.

Atugarliorneq/inerisimannginneq patsisaavoq sumi najugaqarneq illoqarfiillu angerlarsimaffiusup angissusaa apeqqutaatinnagu assigiissumik patsisigineqartartoq.

Niviarsiaqqat amerlanerpaajupput tarnikkut ajornartorsiuteqarlutik efterskolemi atuarnerminnik unitsitsiinnarnerusartut. Taamatuttaaq atuartunit 20-init illoqarfinnit anginerusuneertunit atuartut 14-it immikkoortuni "10.000-it sinnerlugit inullinni" aamma "9999-2000-inik inulinni" nassaassaapput, matumanilu Tasiilaq illoqarfinnut allanut sanilliullugu takussaanerpaavoq.


Angerlarserneq uniinnartarnermut patsisaasut taamaallaat sisamaraat. Tamatumunnga patsisaasinnaavoq Peqatigiiffiup Kalaallit Meerartaasa Allu suliniutigimmagu, angerlarsernerup millisarnissaanik siunertaqartoq. Atuartut 21-it angerlarsertut ilaat 16-it Nuummeersuupput Sisimiuneersuullutillu.

Inuusuttut oqaatsinik unamminartorsiorlutik unittut ikitsoralaannguupput. Unittut taakkua ikitsoralaannguit nunaqarfinniit minnerusuneersuupput.

Piffissaq uniinnarfik

Takussutissiami tulliuttumi ersepoq, ukiup atuarfiusup qanoq ilinerani inuusuttut uniinnartarnerusut. Takuneqarsinnaavoq ukiup atuarfiusup aallartinnerani uniinnartut amerlanerpaariarlutik ukiup ingerlanerani ikiliartortartut aammalu ukiup qaammataani ikinnerpaariarlutik amerleriaqqilaartartut.

Takussutissiaq 6. Efterskolemi atuartut uniinnartarnerat, qaammataini sorlenni efterskolemi atuarnerminnik uniinnarnerannut agguarlugit



Nunap immikkoortuini assigiinngissutit


Takussutissiami tulliuttumi takuneqarsinnaavoq inuusuttut nunap immikkoortuini assigiinngitsuni atuarniarlutik nalunaarsimasut taakkualu uniinnartarnerisa procentii.

Ataatsimut isigalugu inuusuttut ukiuni pingasuni pineqartuni assigiikannersumik agguarlutik atuarnissaminut nalunaarsimapput. Ukiuni atuarfiusumi 2018/2019-imi Aalborgimi atuartut amerleriarput,



tamatumalu nassuiaatissartaraa Galtrup Efterskolep kalaallinik atuartunik amerlisitsinera. Aalborgimi uniinnarnermut procenti ataatsimut isigalugu nunap immikkoortuinit allanit appasinneruvoq, tamatumalu nassuiaatissartaraa Galtrup Efterskolemi aammalu Halvorsminde Efterskolemi atuartut amerlasuujummata, taakkunani efterskoleni Aalborgip eqqaani inuusuttut atuartut 43%-ii atuartuupput, atuarfinnilu taakkunani uniinnartarneq 3-8 %-ip akornanniippoq.

Takussutissiaq 7. Efterskoleni atuartut nunap immikkoortuinit agguarsimameri



Ukioq atuarfiusoq 2016/2017



Ukioq atuarfiusoq 2017/2018



Ukioq atuarfiusoq 2018/2019



Misissuinermit inassuteqaatit

Efterskoleni atuartut atuarnerat pillugu paasissutissat nalunaarsorneqartarnerisa pitsaanerutilernissaat inassutigineqarpoq, taamaaliornikkut ukiut atuarfiusut ataasiakkaat malinnaaffiginissaat paasissutissanillu sanilliunneqarsinnaasunik suliaqarnissaq oqinnerulissammata. Makkua pitsaanerulersitsisinnaapput:

- Atualernissamut nalunaarnerup nalunaarsornerani nukappiaraaneq/niviarsiaraaneq immersuiffissalerlugu
- Atualernissamut nalunaarnermi illoqarfiup angissusaa nalunaarsortalerlugu
- Immersuiffissamik ikkussisoqassaaq, inuusuttumik aperiffiusinnaasumik efterskollemi atuarnerminik piffissaq sioqqullugu unitsitsinissaminik kissaateqarnerisoq, taamaaliornikkut nalunaarsorneqarsinnaalissaaq ilorlikkut avatangiisiniluunniit pissutsit efterskollemi atuartup sivikinnerusumik atuarneranut patsisaanerpaanersut
- Immikkoortuni siumut aalajangersariikkani unitsitsiinnarnermut patsisaasut nalunaarsorneqartassapput, soorlu nalunaarusiami matumani immikkoortut atorneqartut atorneqarsinnaapput, itisiliinissamut allaffiusinnaasumik ilalerlugit

Inassutigineqarpoq suliniutit arlaqartut ingerlanneqassasut inuusuttut efterskolerneranut ikorfartuutaasinnaasut, taamaaliornikkut anisitaasarnerit tarnikkullu ajornartorsiutit unitsitsiinnarnermut patsisaasartut pingaarnerpaajuneri annikillisarneqassammata, soorlu Allu angerlarsertarnermut annikillisaataasimasoq. Suliniutit makkuusinnaapput:

- Kalaallit Illui aqutigalugit tarnikkut ilisimasalinnik kalaallisut ikiorserneqarsinnaaneq
- Ilaqutariit attaveqaataasartut ikorfartorneqarnerunerat
- Angajoqqaanut paasissutissat pitsaanerit, inuusuttut efterskollemi atuarnerannik qanoq tapersersuisinnaanerat pillugu

Efterskolernerup inuusuttunut ataasiakkaanut nalinginik misissuinissaq inassutinut aamma ilaavoq. Tamanna soorlu kalaallit atuartut efterskolernerminni pissarsiaannik kiisalu inuusuttut ilinniagaqaqqittarnerinut efterskolernerup ungasissoq eqqarsatigalugu ilinniagaqarnikkut sunniutaanik kvalitativiusumik misisissuinikkut pisinnaavoq.

Suliassiisoq:

Ilinniartitaanermut Aqutsisoqarfik

Kissarneqqortuunnguaq 20

3900 Nuuk

Suliarinnittoq:

Kalaallit Meerartaat

Balders plads 1

2200 København N

www.fgb.dk

December 2019

